

Na osnovu člana 16. stav 4., Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona", broj 7/10), na prijedlog Ministarstva za obrazovanje, nauku, kulturu i sport, Vlada Zeničko-dobojskog kantona, na 154. sjednici, održanoj dana 12.03.2014. godine, d o n o s i

ZAKLJUČAK

I.

Utvrđuje se Prijedlog Zakona o izmjenama i dopunama Zakona o javnim priznanjima Zeničko-dobojskog kantona.

II.

Prijedlog Zakona iz tačke I. ovog zaključka upućuje se u dalju Skupštinsku proceduru po redovnom postupku.

III.

Zaključak stupa na snagu danom donošenja.

Broj: 02-_____/14.

Datum, 12.03.2014. godine

Z e n i c a

PREMIJER

Munib Husejnagić, dipl.ing.maš.

DOSTAVLJENO:

1x Ministarstvo za obrazovanje, nauku, kulturu i sport,

1x Predsjedavajućem Skupštine ZDK-a,

1x a/a.

PRIJEDLOG

**Bosna i Hercegovina
Federacija Bosne i Hercegovine
Zeničko-dobojski kanton
Ministarstvo za obrazovanje, nauku, kulturu i sport**

Z a k o n
o izmjenama i dopunama Zakona o javnim priznanjima Zeničko-dobojskog kantona

Zenica, februar/veljača 2014. godine

PRIJEDLOG

Na osnovu člana 37. stav 1. tačka f) Ustava Zeničko-dobojskog kantona, („Službene novine Federacije BiH“, broj 7/96, „Službene novine Zeničko-dobojskog kantona“, broj 1/96, 10/00, 8/04 i 19/04), Skupština Zeničko-dobojskog kantona, na __. sjednici održanoj dana __. __. 2014. godine, donosi

ZAKON

o izmjenama i dopunama Zakona o javnim priznanjima Zeničko-dobojskog kantona

Član 1.

(Izmjena člana 2-Vrste javnih priznanja)

U članu 2., Zakona o javnim priznanjima Zeničko-dobojskog kantona, („Službene novine Zeničko-dobojskog kantona“, broj: 6/13), (u daljem tekstu: Zakona), stav (3), mijenja se i glasi: „(3) Javni konkurs iz stava (2) ovog člana, raspisuje i provodi Služba za zajedničke poslove Vlade Zeničko-dobojskog kantona, uključujući i realizaciju pratećih tehničko-štamparskih usluga konačno izabраниh oblika javnih priznanja.“

Član 2.

(Dopuna člana 3- Inicijativa i uslovi za Počasnog građanina Kantona)

U članu 3., Zakona, u stavu (1), iza riječi: „poslanici“, dodaju se riječi koje glase: „jedinice lokalne samouprave,“.

Član 3.

(Dopuna člana 5-Pravo predlaganja javnog priznanja)

U članu 5., Zakona, iza riječi: „imaju“, dodaju se riječi koje glase: „jedinice lokalne samouprave,“.

Član 4.

(Izmjena člana 6- Donošenje i verifikacija odluke)

U članu 6., Zakona, stav (1)., mijenja se i glasi:

„(1) O dodjeli javnih priznanja, iz člana 2. ovog Zakona, odlučuje Odbor koji imenuje Vlada Kantona na osnovu dostavljenih i obrazloženih prijedloga od strane komisija Skupštine Kantona, kao i resornih ministarstava, i drugih kantonalnih organa uprave i institucija.“

Član 5.

(Dopuna i izmjena člana 7-Sastav i mandat Odbora)

Član 7., Zakona, mijenja se i glasi:

„(1) Odbor sa sastoji od predsjednika, zamjenika predsjednika i pet članova, kao i sekretara i dva člana zadužena za stručne i administrativne poslove Odbora.

(2) Članovi Odbora iz stava (1) ovog člana, su istaknute osobe iz svih segmenata javnih i društvenih aktivnosti, (obrazovanja i nauke, medicinskih i zdravstvenih dostignuća, privrednih djelatnosti, kulture i sporta, ljudskih prava i sloboda, odbrane i zaštite i spasavanja imovine i osoba, humanitarno-karitativnih i drugih socijalnih aktivnosti, nevladinog sektora).

(3) Sekretar i dva člana zadužena za stručne i administrativne poslove imenuju se iz reda državnih službenika i namještenika.

(4) Mandat Odbora traje dvije godine.“

Član 6.

(Izmjene i dopuna člana 8-nadležnosti Odbora)

U članu 8., u tački a), riječi: „,po potrebi,“, se brišu.

U istom članu, tačka c), mijenja se i glasi:

„c) predlaže dodjelu Javnog priznanja;“

U tački d), iza riječi: „Povelje“, dodaju se riječi: „ i Plakete.“

Član 7.

(Izmjena člana 10- Naknada za rad u Odboru)

U članu 10. Zakona, stav (2), mijenja se i glasi:

„(2) Vlada Kantona, rješenjem o imenovanju utvrđuje i visinu naknade članovima Odbora iz prethodnog stava.“

Član 8.

(Izmjena člana 15- Stručni i administrativni poslovi Odbora)

Član 15., briše se.

Član 9.

(Stupanje na snagu)

Zakon stupa na snagu narednog dana, od dana objavljivanja u „Službenim novinama Zeničko-dobojskog kantona“.

Broj: 01-_____ /14.

Datum, __.__.2014. godine

Z e n i c a

PREDSJEDAVAJUĆI

Sretko Radišić

DOSTAVLJENO:

1x Stručna služba Skupštine,

1x Ministarstvo za obrazovanje, nauku, kulturu i sport,

1x Službene novine Zeničko-dobojskog kantona,

1x a/a.

OBRAZLOŽENJE

Pravni osnov

Pravni osnov za donošenje ovog Zakona sadržan je u članu 37. stavu 1. tačka f) Ustava Zeničko-dobojskog kantona („Službene novine Federacije BiH“, broj: 7/96, „Službene novine Zeničko-dobojskog kantona“, broj: 1/96, 10/00, 8/04 i 19/04).

Razlozi za donošenje Zakona

Nakon stupanja na snagu Zakona o javnim priznanjima Zeničko-dobojskog kantona, („Službene novine Zeničko-dobojskog kantona“, broj: 6/13), uslijedila je Inicijativa Komisije za izbor i imenovanja Skupštine Kantona da se od strane Ministarstva za obrazovanje, nauku, kulturu i sport, Ureda premijera i Vlade Kantona, u roku od 30 dana dostavi Nacrt Izmjena i dopuna navedenog zakona, a što je i prihvaćeno Zaključkom Skupštine Kantona, broj: 01-02-16604/13., od 31.07.2013. godine. Postupajući po navedenom zaključku, a u odnosu na iznesene razloge sa Skupštinske rasprave koja je i prethodila prihvaćanju Inicijative, prema mišljenju obrađivača, uz prethodno obavljene dodatne usmene konsultacije, predloženim izmjenama i dopunama, precizirane su pojedine odredbe Zakona čija je primjena u praksi bila otežana, te su predložena konkretna poboljšanja teksta Zakona. S obzirom na činjenicu da je neophodno da izmjene i dopune budu detaljno razmatrane od strane većeg broja zainteresiranih subjekata, Skupština Kantona je na svojoj 47. sjednici, od 03.12.2013. godine, a nakon razmatranja Zakona u formi Nacrta, donijela Zaključak broj: 01-02-23415/13., o prihvatanju Nacrta, uz obavezu da svi organi kantonalne uprave, općine, udruženja građana i drugazainteresirana pravna lica i građani, u ostavljenom roku od 15 dana, dostave svoje primjedbe i sugestije resornom ministarstvu kao obrađivaču, koji je u cjelosti i realizovan. Nakon isteka ostavljenog roka iz navedenog zaključka Skupštine, kao i činjenice da nije bilo novih prijedloga niti sugestija u odnosu na sadržinu teksta iz Nacrta Zakona, pristupilo se izradi Prijedloga Zakona, koji također predlažemo Skupštini Kantona na razmatranje **u redovnoj proceduri**.

Obrazloženje pravnih rješenja

Prijedlogom Zakona o izmjenama i dopunama Zakona o o javnim priznanjima Zeničko-dobojskog kantona, („Službene novine Zeničko-dobojskog kantona“, broj: 6/13), data su poboljšana rješenja koja se posebno odnose na:

- nadležnosti-postupanje resorne službe u Vladi Kantona na raspisivanju i realizaciji javnog konkursa, odnosno poslove tehničke pripreme i štampe javnih priznanja,
- pravo i mogućnost dostave prijedloga kandidata od strane jedinica lokalne samouprave, (općina sa područja Kantona),
- preciziran i poboljšan način predlaganja članova Odbora,
- preciziran sastav članova Odbora, uz navođenje i osoba zaduženih za stručne-administrativno-tehničke poslove za članove Odbora,
- trajanje mandata članova Odbora,
- stupanje na snagu Zakona.

Obrazloženje pojedinih zakonskih rješenja

Članom 1. se definiše postupanje nadležne službe u Vladi Kantona vezano za procedure raspisivanja i provođenja javnog konkursa, odnosno pratećih tehničko-štamarskih poslova na izradi konačnih prijedloga izgleda i sadržine Javnih priznanja. S obzirom da je Zaključkom Skupštine, (od 31.07.2013. godine), težište poslova, odnosno postupanja sa Stručne službe Skupštine pomjereno u nadležnost Vlade Kantona, bilo je neophodno precizirati Službu za

zajedničke poslove kao konkretno zaduženu za provođenje stručnih poslova za službe Vlade, a sve u skladu sa odredbama Zakona o kantonalnim ministarstvima i drugim tijelima kantonalne uprave.

Članovima 2. i 3., daje se mogućnost dostave prijedloga za dodjelu javnih priznanja i jedinicama lokalne samouprave, jer je ipak riječ o obilježavanju Dana Kantona, kao zajedničkog jubileja za sve građane na svom području, i čije konačne prijedloge verificira Skupština kao najviše tijelo i reprezent Kantona.

Članom 4. preciziran je i poboljšana način predlaganja članova Odbora.

Članom 5. preciziran je sastav članova Odbora, opseg društvenih-javnih djelatnosti, odnosno struktura i segmenata iz kojih mogu biti predloženi laureati, uz precizno navođenje i osoba zaduženih za stručne-administrativno-tehničke poslove za članove Odbora, (zbog čega je u članu 8., i brisan prethodni član 15. Zakona), te trajanje mandata članova Odbora,

Članom 6. naglašava se obaveza bliže izrade kriterija za rad i odlučivanje od strane Odbora, te ujednačavanje postupanja za obje vrste javnih priznanja.

Članom 7. su utvrđene obaveze plaćanja naknade za rad svih članova Odbora, u samom rješenju o imenovanju, kako bi se izbjegle situacije da se naknadno ne donesu blagovremena posebna rješenja o naknadama i isto odrazi na ukupan kvalitet stručnog rada ili angažovanja u Odboru.

Članom 8. brisan je prethodni član 15., Zakona kojim je Stručna služba Skupštine bila zadužena za pružanje stručnih i administrativnih poslova za Odbor, a da ista nije bila (ni tehnički, ni kadrovski), kapacitirana za navedene poslove. Ujedno smatramo da nema smetnji da Stručna služba Skupštine, i dalje bude zadužena za vođenje evidencija o dodijeljenim Javnim priznanjima, jer je ipak riječ o manje obimnim i manje složenim poslovima vezanim za priznanja koja i konačno verificira i dodjeljuje Skupština Kantona.

Članom 9. se utvrđuje stupanje na snagu Zakona.

Finansijski pokazatelji

S obzirom da donošenje ovog Zakona, suštinski predstavlja samo izvjesna preciziranja, odnosno poboljšanja teksta važećeg Zakona o o javnim priznanjima Zeničko-dobojskog kantona, („Službene novine Zeničko-dobojskog kantona“, broj: 6/13), mišljenja smo da usvajanje i primjena predloženih izmjena i dopuna, neće zahtijevati dodatna finansijska sredstva u odnosu na prethodno planirana sredstva iz Budžeta Zeničkog-dobojskog kantona za 2013. godinu, a čije osiguranje je također bilo uvjetom za njegovim razmatranjem i donošenjem od strane Skupštine Kantona.

Stoga predlažemo Skupštini Zeničko-dobojskog kantona da razmotri dostavljeni prijedlog Zakona o izmjenama i dopunama Zakona o o javnim priznanjima Zeničko-dobojskog kantona, **u redovnoj proceduri.**

MINISTAR
Mirko Trifunović